

Inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaata allangortinneqarneranik Inatsisartut peqqussutaat nr. 1, 16. maj 2008-imeersoq (Inuussutissarsiutinut pikkorissartitsisarnerni tapiissuteqartarnermut inatsisini pineqartut annertusineqarnerat, sungiusaammik sulinermi akissarsianut maleruagassat, kiisalu suliassa qarfiup allangorneranut tunngatillugu erseqqissaatit)

§ 1

Inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaata nr. 2, 31. maj 1999-imeersup Inatsisartut peqqussutaatigut nr. 11, 18. december 2003-meersukkut allangortinneqartoq, imaattunik allanguuteqartinneqassaaq:

1. Inatsisartut peqqussutaata taaguutaa imatut oqaasertalerneqassaaq:

"Inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit inatsisartut peqqussutaat"

2. Qulequtaq § 1 sioqqullugu, imatut oqaasertaqassaaq:

"Siunertaq"

3. Inatsisartut peqqussutaanni allassimasut "inuussutissarsiutinut ilinniartitaanermi pikkorissarneq" tamarmik allangortinneqassapput: "pikkorissarnerit, inuussutissarsiutinut ilinniartitaanermut tunngasut".

4. § 3-mi allangortinneqassaaq: "Kulturimut, Ilinniartitaanermut Iisimatusarnermullu" imaalillugu: "Inuussutissarsiutinut ilinniartitaanerit".

5. Inatsisartut peqqussutaanni allassimasut " Kulturimut, Ilinniartitaanermut Iisimatusarnermullu" tamarmik allangortinneqassapput imaalillugit: "Ilinniartitaanermut Pisortaqarfik".

6. § 6, imm. 1-imi oqaaseqatigiinni siullerni, "ilinniartitaanerit nutaat" kingorna ivertinneqassaaq, akuersissutigisassavaat brancheudvalg-it ilinniartitaanermut pilersaarutinik inassuteqareernerisigut".

7. § 22, imm. 1, atorunnaarsinneqassaaq.

Imm. 2 taamaalilluni imm. 1-inngussaaq.

8. § 36 imatut oqaasertalerneqassaaq:

"Ilinniagaqartoq inuussutissarsiutinut ilinniartitaanermut atasumik sungiusaammik suliffeqartoq sungiusaammik sulinermini akissarsiaqartineqassaaq isumaqatigiissut atuuttoq naapertorlugu, aammalu immikkut tapiissutinik pisartagaqassalluni Inatsisartut ilinniartuunersiuteqartarnermut peqqussutaat naapertorlugu. Sungiusaammik suliffigineqartoq ataatsimoorussamik isumaqatigiissutaasunik tunngavissaqanngippat, ilinniagaqartoq minnerpaamik akissarsiaqarlunilu sulinermini atugassaqartinneqassaaq pisortat sulisitsisuini ilinniagaqartut sulinerminni atugassaqartitaanerit

akissarsiaqartitaanerallu pillugu isumaqatigiissutaasut tunngavigalugit.

Stk. 2. Ilinniagaqartoq inuussutissarsiutinut ilinniartitaanerni atuartuusooq ilinniagarnerisuteqartinneqassaaq inatsisartut ilinniagaqarnerisuteqarneq pillugu peqqussutaat naapertorlugu."

9. § 47 sioqqullugu qulequtaasooq imatut oqaasertalerneqassaaq:

"Pikkorissaanerit inuussutissarsiutinut ilinniartitaanernut tunngasut".

10. § 47 imatut oqaasertalerneqassaaq:

" § 47. Aningaasanut inatsimmi aningaasaliissutaasimasut iluanni tapiissuteqartoqarsinnaavoq pikkorissaanerit inuussutissarsiutinut ilinniartitaanermut tunngasunut, suliamik ilinniagalinnut suliamillu ilinniagaqarsimanngitsunut sammititaasunut, tassungalu ilanngullugu suliffissaaleqisunut, annnerpaamik ingerlaqqiffiusumik naatsumillu inuussutissarsiutitsigut ilinniagaqarsimasunut. Aammattaaq inuussutissarsiutinut immikkut tapersorsorniarneqartunut atatillugu pikkorissarnernut aningaasartuutaasunut tapiissuteqartoqarsinnaavoq, namminersortutut inuussutissarsiuteqartunut minnerusunik suliffiuteqartunut, inuussutissarsiutinut ilinniakkanik ingerlaqqiffiusunik sivikinnerusunik ilinniagaqarsimasunut.

Imm. 2. Pikkorissarnerit inuussutissarsiutinut ilinniartitaanernut ilinniarfinit isumagineqassapput, aammalu tamanut ammasumik neqeroorutigineqassallutik, taamaattoq imm. 3 naapertorlugu.

Imm. 3. Taamaattoq imm. 2-mi taamatut allassimasoqaraluartooq inuussutissarsiutinut ilinniartitaanermut tunngasuni pikkorissarnernut tapiissuteqartoqarsinnaavoq, pikkorissaasartut allat neqeroorutaannut, pikkorissaanernik assingusunik inuussutissarsiutinut ilinniarfinit neqerooruteqartoqanngippat. Tamatumalu saniatigut inuit ataasiakkaat pikkorissarnernut peqataanissaannut tapiissuteqartoqarsinnaavoq, inuussutissarsiutinut ilinniartitaanermut tunngasuni pikkorissarnernut inuussutissarsiutinut ilinniarfinit neqeroorutigineqangitsunut.

Imm. 4. Sulisut sinniisaasa pikkorissartinneqarnerinut imaluunniit taakkunani peqataanermut tapiissutinik tunniussisoqarsinnaanngilaq.

Imm. 5. Taamaallaat qinnuteqartoqarnera tunngavigalugu tapiissuteqartoqarsinnaavoq."

11. § 49 imatut oqaasertalerneqassaaq:

" § 49. Naalakkersuisut maleruagassiorsinnaapput pikkorissaanerit tapiissuteqarfigineqarsinnaasut siunertaat pillugit, tapiissuteqartarnermi piumasarisat pillugit, tassungalu ilanngullugu tapiiffigineqarnissamut qinnuteqarnermi periusissat pillugit, tapiissutit annertussusissaat tunniunneqartarnerallu pillugu, tassunga ilanngullugit ullormut tunniunneqarsinnaasut annertussusissaat pillugu, aammalu pikkorissartitsisarnerni nalinginnaasumik maleruagassaqarnissaa pillugu."

§ 2

Inatsisartut peqqussutaat atortuulerpoq 1. juni 2008.

Namminersornerullutik Oqartussat, ulloq 16. maj 2008

Hans Enoksen

/

Siverth K. Heilmann